

謝伯陽 編纂

全明散曲

(增補版)

齊魯書社

(四)

謝伯陽 編纂

全明散曲

(增補版)

(四)

任丰塘敬題



齊魯書社

吳國寶

吳國寶，號萬湖，南直隸（今安徽）無爲人。廷翰哲嗣。嘉靖二十九年（一五五〇）進士。居官以廉干著聲。詩文皆有父風。

小令

【南商調黃鶯兒】

終日醉醺醺。醉醺醺醉轉醒。醉來江海都吞盡。戴彭澤鹿巾。傾杜陵瓦盆。那些兒滋味真風韻。醉醺醺。醺醺兒醉。真個賽劉伶。（洞雲清響）

終日醉綿綿。醉綿綿醉轉顛。醉鄉深處都遊遍。那竹林七賢。那飲中八仙。喜他們終日同爲伴。醉綿綿。綿綿兒醉。醉破小壺天。（洞雲清響）

終日睡懨懨。睡懨懨睡轉甜。睡來斜倚青山伴。送烏兔几前。掛興亡枕邊。夢兒裡多少英雄漢。睡懨懨。懨懨兒睡。真個小陳搏。（洞雲清響）

終日睡朦朦。睡朦朦睡轉濃。睡來鼻息如山重。那邯鄲小童。那華胥老翁。看他們

都是一般夢。睡朦朦。朦朦兒睡。睡損玉山峰。（洞雲清響）

終日笑呵呵。笑呵呵笑轉多。笑來笑得青天破。想浮世烏羅。嘆人生蟻柯。險些兒笑倒在西彌坐。笑呵呵。呵呵兒笑。真個活彌陀。（洞雲清響）

終日笑嘻嘻。笑嘻嘻笑轉痴。笑來笑得天花墜。那七雄逞機。那五侯鬪奇。看他們真箇如兒戲。笑嘻嘻。嘻嘻兒笑。笑殺白銅堤。（洞雲清響）

【北雙調對玉環帶過清江引】

不對名花。也難空酌酒。不遇知音。也難開笑口。客至又花開。盃行剛到手。休論酸甜。須傾三百斗。醉眼昏花。歸去扶紅袖。老人家非是真貪酒。就裡都參透。一朝那話來。半世甘生受。試看有幾人活到九十九。（洞雲清響）

纔見春來。忙忙歸去早。纔見青年。剛剛又到老。去的又還來。老的何曾小。說短論長。人生空自擾。奪利爭名。天公有分曉。貧窮富貴一般樣老。使不得些兒巧。總有聚寶盆。枉積鴉青鈔。把一箇沈萬三乾罷了。（洞雲清響）

一日一場。打箇哈哈笑。一飲一盃。叫箇聲聲好。輕將檀板敲。謾把琵琶掃。只唱新詞。舊曲都翻調。只論今朝。往日都勾倒。光陰來的年年少。緊趕着方爲妙。你

道你多忙。他說他無鈔。問先生哪一日纔是箇了。（洞雲清響）

蠅利蝸名。貪戀何時止。蟻陣蜂衙。爭鬧何時止。七十古來稀。百年如撚指。半是憂愁。半是風和雨。忙裏偷閑。工夫能有幾。眼前且圖箇心歡喜。身後休憂慮。對景便開懷。遇酒須教醉。莫待到無常來方去悔。（洞雲清響）

【南商調黃鶯兒】

莫放酒盃寬。醉簪花倒着冠。舞裙歌板相牽挽。喚花枝曉寒。弄笛聲夜闌。人生最喜身康健。且加飡。黃花白髮。冷眼付人看。（洞雲清響）

散髮弄扁舟。學鴟夷理釣鉤。五湖烟月閑消受。富和貴怎求。貧和賤枉憂。人間萬事君知否。恨難收。不如拋却。吾道付滄洲。（洞雲清響）

誰弱又誰強。更何須論短長。虛名微利空痴想。嘆浮生自忙。趁閑身且狂。清風皓月休虛放。莫相妨。百年是醉。三萬六千場。（洞雲清響）

茅屋結三間。買青山學愛閑。道人未老心先懶。俯清溪數灣。栽脩竹數竿。蒲團茗椀家常飯。小留連。招呼風月。身外事總無關。（洞雲清響）

世路苦多岐。似悠悠風絮飛。翻來覆去無憑據。那伊周濟時。這淵明早歸。古今榮

辱皆如是。細尋思。竹籬茅舍。獨與懶相宜。（洞雲清響）

春夢短無憑。嘆人情薄似雲。流行坎止皆由命。趁花枝正新。遇金盃且傾。陰晴明日猶難定。放寬心。暫時歡笑。何用苦勞神。（洞雲清響）

詠月

圓影正婆娑。喜良宵三五多。水晶宮殿冰壺坐。散天香綺羅。對金樽浩歌。南樓興好人難卧。問嫦娥。明年此夜。還似這般麼。（洞雲清響）

玉宇色澄鮮。敞瓊樓照綺筵。一輪輦破銀河岸。泛金波渺然。弄清光皎然。分明得見嫦娥面。願嬋娟。年年歲歲。常似這般圓。（洞雲清響）

自詠

做箇圓圖頭。不封官不拜侯。鳬長鴨短從天受。強求的莫求。好休時便休。纔思量進步忙回首。圓圖頭。隨緣過活。快樂是良謀。（洞雲清響）

結個喜歡緣。不燒丹不坐禪。呼牛喚馬從人便。少造些孽冤。廣種些福田。道三箇好和身轉。喜歡緣。隨時消遣。自在是神仙。（洞雲清響）

老去莫心貪。閉山中虎豹關。翻身跳出坑人窰。挽沉舟上灘。推鮎魚上竿。臨崖失馬收韁晚。莫心貪。五侯七貴。應羨老僧閑。（洞雲清響）

老去莫心狂。散筵前傀儡場。伸拳打脫牽纏障。列金釵兩行。積金玉滿廂。五陵豪氣三千丈。莫心狂。沙鷗水鳥。堪嘆鷺鷥忙。（洞雲清響）

題湖南草堂

茅屋枕湖涯。小橋通一徑斜。好山當面如排畫。傍東門種瓜。繞東籬種花。竹窗草坐清風榻。泛湖槎。門垂五柳。彷彿似陶家。（洞雲清響）

茅屋壓湖邊。柳沿堤花滿川。澄波數點如拖練。開種玉小軒。鋤養鶴薄田。薰爐茗椀閑書卷。泛湖船。漁人來往。仿佛似桃源。（洞雲清響）

【南正宮玉芙蓉】

花前有暗期。曾把雕欄指。道明年花裡。莫遣來遲。春風二月多明媚。又早韶光三月時。花將罷。能有幾枝。向花前空悵望不見那人兒。（洞雲清響）

花前携手時。誓與花常對。道明年花裡。共飲金卮。當時只約花開至。花落緣何尚

未歸。奴盼望。千回萬回。那花前莫不是另有個人兒。（洞雲清響）
花前携手時。願與花相似。道明年花裡。共解羅衣。書來書去空流淚。花落花開總
未知。奴思忖。如醉似痴。那薄情莫不是忘了這些兒。（洞雲清響）

【南南呂一江風】

題情

縷金衣。多少花前淚。咫尺人千里。想當初。一幅鸞箋。兩個鴛鴦字。香雲落剪時。
香雲落剪時。心中只自知。這椿兒瞞不過天和地。（洞雲清響）

紫雲臺。臺下春如海。日日香風靄。到于今。鶯老花殘。柳絮尤無賴。蕭郎來不來。
蕭郎來不來。雙蛾鎖不開。這釵兒鎮日無心戴。（洞雲清響）

木香棚。棚底春如甕。夜夜笙歌湧。嘆分飛。斷雨殘雲。都是陽臺夢。含淚向東風。
含淚向東風。無言兩拜中。這衾兒何日能相共。（洞雲清響）

露香亭。多少陽關恨。人遠天涯近。謾凝眸。倚遍欄杆。望斷薜蘿徑。錦帶結同心。
錦帶結同心。紅絲挽玉簪。這些兒翻做愁和悶。（洞雲清響）

【南仙呂桂枝香】

春風庭榭。牡丹花下。也曾把銀燭高燒。說不盡清歡良夜。嘆一隔歲華。嘆一隔歲華。清歌遂罷。情牽意惹。怎忘他。願言長守花前約。莫遣開時不在家。（洞雲清響）

春風芳徑。海棠標韻。歡賞時人氣花香。都則是一般輝映。嘆一隔綵雲。嘆一隔綵雲。賞情未盡。多愁多病。到于今。願言常守花前約。莫遣看花是別人。（洞雲清響）

碧桃花底。紫雲仙子。武陵源無限風光。恍惚間殆非人世。嘆一別路岐。嘆一別路岐。茫茫烟水。追遊無計。幾人知。尋思再得花前會。準擬花前似舊時。（洞雲清響）

紅蓮歌吹。碧雲心事。想那時幾許幽情。都化作兩行清淚。嘆一歌此辭。嘆一歌此辭。此心如醉。不堪憔悴。見應稀。尋思若得花前會。只恐花前又別離。（洞雲清響）

【南商調黃鶯兒】

春恨強難裁。淚痕兒暗滿腮。薄衾疎冷無聊賴。節令又乖。風雨又來。落紅萬點愁如海。恨難裁。春光去也。塵鏡掩粧臺。（洞雲清響）

秋恨強難持。窗風兒暗透幃。薄衾單枕無情思。葉兒又飛。燕兒又歸。碧天一夜涼

如水。恨難持。秋光到也。和淚寄征衣。（洞雲清響）

舊恨在心頭。一點兒終日有。堆堆積積成窩臼。無處可搜。無筆可勾。作酸作苦甘經受。見無由。除非見了。纔得去心頭。（洞雲清響）

新恨在眉尖。一星兒沒躲閃。勾勾引引如針線。既斷復連。纔減又添。或來或往誰呼喚。見無緣。除非見了。纔得下眉尖。（洞雲清響）

陡被病兒纏。這身兒不似前。脚兒手兒都酸軟。茶飯兒不甜。枕席兒不安。冤兒屈兒難分辨。病兒纏。人兒又遠。書兒有誰傳。（洞雲清響）

只見病兒增。這心兒分外疼。頭兒腦兒都昏暈。眼睛兒懶睜。耳朵兒懶聽。言兒語兒難扎掙。病兒增。天兒又冷。被兒有誰溫。（洞雲清響）

轉覺病兒深。藥罐兒不離門。釵兒釧兒都那盡。籤兒又不明。卦兒又不靈。神兒鬼兒難憑證。病兒深。魂兒不定。命兒也難存。（洞雲清響）

只見病兒磨。腸兒疼勾不着。傳來的話兒多差錯。上焦兒怎麼。下步兒怎麼。胸膛兒可曾寬些箇。病兒磨。藥兒是我。品味兒不須多。（洞雲清響）

若得病兒鬆。丹方兒最有功。寄奴兒一味全身用。丸兒也通。錠兒也通。蘇兒煎作湯兒送。病兒鬆。藥兒貴重。道地是江東。（洞雲清響）

若得病兒痊。這方兒不用錢。檳榔兒一味咀成片。乳鉢兒細研。手心兒謾丸。津兒唾兒頻頻嚙。病兒痊。方兒纔驗。一貼兒永安然。（洞雲清響）

【南仙呂入雙調玉抱肚】

愁心難整。到黃昏不覺斷魂。亂砧聲蟋蟀風悲。攬烏啼霜天月冷。無眠一夜淚縱橫。不是思君是恨君。（洞雲清響）

愁心漸長。到黃昏不覺斷腸。魂杳杳半壁寒燈。淚雙雙一聲孤雁。相思此夜正茫茫。地角天涯未是長。（洞雲清響）

十分愁病。到春來更添幾分。冷落了歌管樓臺。憔悴了鞦韆節令。落花時候暗消魂。枝上流鶯和淚聞。（洞雲清響）

千層愁悶。到春來更添幾層。掩粧臺暗淚盈盈。綰遊絲柔腸寸寸。月明花落又黃昏。斜倚薰籠坐到明。（洞雲清響）

別離懊恨。那蘼蕪滿路又生。昨日箇斷雨殘雲。今日箇墮釵分鏡。楊花愁殺盪舟人。君向瀟湘我向秦。（洞雲清響）

音塵間阻。問歸期日遠日疎。數不盡疊疊雲山。望不見茫茫烟樹。西風吹妾妾憂夫。

夫在蕭關妾在吳。（洞雲清響）

花神可問。這花下誰道不曾。是誰將羅帕上留題。是誰把香雲作證。對花欲語又沉吟。舊事淒涼不可聽。（洞雲清響）

且休題那話。羞殺我年年等他。甜句兒一似風吹。謊呪兒又如天大。古人言語不曾差。流水無心戀落花。（洞雲清響）

清明將到。這些時轉覺寂寥。却緣何沒箇書來。莫不是初心變了。冤家何事又蹊蹺。等到于今沒下稍。（洞雲清響）

清明節屆。猛然間淚珠滿腮。惱春色被燕子啣殘。怪風雨將梨花打碎。清明只道也難捱。惱恨清明又不來。（洞雲清響）

清明已過。看淚珠日日漸多。嘆三春這樣淒涼。想四時總成耽擱。相思從此又來磨。想是前生少欠他。（洞雲清響）

套數

南北雙調合套

歸興

【新水令北】憶秋風遷客去長沙。喜歸來小南山下。水田三四畝。茅屋兩三家。暮靄朝霞。暮靄朝霞。粧點似那王維畫。

【步步嬌南】嘆浮生碌碌如奔馬。世事同飄瓦。風塵障海涯。雪滿長安。波浪連三峽。路險虎狼桫。命乖却被兒童罵。

【折桂令北】到如今脫離波查。消受安閑。躲避喧嘩。愛的是綠水青山。皓月清風。翠竹黃花。不索問那鳳閣龍樓。再休提大纛高牙。春雨桑麻。秋水魚蝦。五雲洞日暮樵歌。萬湖堤夜月仙槎。

【江兒水南】緩步青莎軟。高眠紅日斜。清吟玉露茶蘼架。遇田夫笑問雞豚價。伴漁翁閑論興亡話。只恁心無牽掛。覷着他覆雨翻雲。怎比我推壘粧啞。

【雁兒落帶得勝令北】有時節傍青門學種瓜。有時節倚繩床自煮茶。有時節羊裘冒雪

穿。有時節驢背尋春跨。有時節嘗酒過鄰家。有時節掃松花採蕨芽。有時節共山妻稚子飯胡麻。恁道他榮也麼華。總不如葫蘆提一任閑頑耍。

【僥僥令南】汗馬功勞四海誇。臺閣三公大賣弄殺。青錢萬選才。沒福分且由他。沒福分且由他。

【收江南北】呀。俺只圖黃昏一覺呵。誰待要五夜早排衙。逢着良辰美景興偏加。趁佳賓賢主多閑暇。儘逍遙自放達。儘逍遙自放達。爲甚麼漢嚴陵懶見南陽駕。

【園林好南】也不須舞清商輕籠絳紗。也不須燒銀燭香焚瑞鴨。小小的花臺月榭。紅樹遶碧雲遮。紅樹遶碧雲遮。

【沽美酒帶太平令北】踏東郊油壁車。對南薰香風榻。向那些柴門野艇傍鷗沙。烹雪梅花夜。四時中景物賒。草團標自在生涯。都忘了爲兒女謀婚嫁。我呵想從前識差。見差。戀功名無休。無罷。呀。把一個知足先生也險笑殺。

【清江引南】家貧有地堪學稼。夢不到麒麟畫。山歌元亮詞。日課君平卦。漫騰騰受用些閑瀟灑。（洞雲清響）

南北雙調合套

閱世

【新水令北】兩輪日月疾如梭。興亡事有誰參破。一心扶帝軸。雙手挽天河。多少嘍囉。多少嘍囉。都做了高塚麒麟卧。

【步步嬌南】英雄回首隨緣過。屈指無多箇。把閑氣盡消磨。展放眉峰。冷淡心頭火。有山有水有行窩。無煩無惱無災禍。

【折桂令北】嘆浮生枉自奔波。一事無成。兩鬢先皤。圖甚麼黃閣宣麻。紫塞提兵。白日揮戈。煙迷了金谷危樓。草滿了帝闕銅駝。花底鳴珂。掌上嬌歌。等閑間鶴唳東門。一霎時夢轉南柯。

【江兒水南】白髮終難變。黃金那用多。眼前榮悴花開落。論貧窮有個夷齊餓。論功勞有個韓彭大。畢竟誰差誰錯。撞不開地網天羅。解不脫名韁利鎖。

【雁兒落帶得勝令北】有幾個剪羣雄霸山河。有幾個吞六合蕩妖魔。有幾個開疆展土臣。有幾個斷國謀王佐。有幾個勒燕然勳業標。有幾個斬樓蘭威名播。有幾個把冰

雪裁。有幾個把鹽梅和。有幾個畫閣朱樓結綺羅。有幾個捧銀箏錦瑟擁青娥。似恁般嘍也麼囉。只怕他到頭來難逃躲。

【僥僥令南】清都潛虎豹。平地起風波。酒寨棋兵羊腸坂。亂紛爭多坎坷。亂紛爭多坎坷。

【收江南北】呀。蚤知道世路有蹉跎。誰承望利名場無推挫。倒不如安貧守分藏丘壑。但逢時對景且高歌。只落得清閑快活。清閑快活。便是夢魂兒去不到凌烟閣。

【園林好南】驢驢裘有池中芰荷。紫駝峰有牆頭薜蘿。七香車有花藤草坐。漱石齒枕山阿。漱石齒枕山阿。

【沽美酒帶太平令北】採青松聽樵歌。釣滄江掛漁簑。待學那騎牛扣角綠楊坡。吹牧笛依腔和。訪知音穿林落。對村醪高張雲幕。把風花和雪月閑吟課。我呵任疎狂詩魔。酒魔。得安樂無求。無慕。呀。這才是安穩的家緣過活。

【清江引南】坎止流行隨處可。富貴浮雲過。跨蹇驢勝鰲背馱。擁敗絮比重裯卧。一任他是和非榮和辱都到不得我。（洞雲清響）

自 壽十月小陽春

【南仙呂入雙調惜奴嬌】繡幕紗廚。喜春回陽谷。人在蓬壺。風流佳客。相攜嬌艷名

姝。歡呼。彩袖翩翩青鸞舞。敲檀板歌金縷。捧壽圖。堪羨瑤池王母。海上麻姑。

【前腔換頭】耆儒。幸際唐虞。他心懸廊廟。身在江湖。百年間氣。飛騰萬里雲衢。獨

步匡扶。迅掃妖氛清疆宇。早功成勳名樹。捧壽圖。堪羨陶潛松菊。張翰蓴鱸。

【黑麻序】軒朱。玉戶金鋪。把堂開綠野。橋臨子午青谿。且忘情軒冕。混跡樵漁。閒居。瑤花步玉除。丹山挺碧梧。捧壽圖。堪羨籌添海屋。鶴駕。仙臯。

【前腔】知機。未老懸車。看筵前羅綺。盃中酒滴珍珠。更玄猿獻果。青鳥啣書。丹符。星光耀絳都。香煙裊篆爐。捧壽圖。堪羨留侯辟穀。范蠡。歸湖。

【錦衣香】壽城開。春初霽。化日舒。風猶麗。福海無窮。壽山無際。龜齡鶴算與天齊。名登寶籙。身卸元樞。任逍遙歲月。幸遭逢昇平之世。天上神仙聚。朱幡葆宇。一朵紅雲。滿庭香霧。

【漿水令】香拂座櫻唇半吐。步迴波柳腰低舞。金釵隊隊蹙花奴。屏開雲母。座列珊瑚。貂蟬擁。環珮趨。人間宰相神仙府。華封祝。華封祝。笙歌盈路。歡聲沸。歡聲沸。錦繡模糊。

【尾】小陽春。人初度。玉燭調和氣象孚。願歲歲年年捧壽圖。（洞雲清響）